

欽定古今圖書集成

方輿彙編職方典



欽定古今圖書集成方輿彙編職方典

第六百六十七卷目錄

江寧府部藝文三 詞

桂枝香 金陵懷古

宋王安石

西河 金陵懷古

周美成

滿江紅 烏衣園

吳潛

沁園春 鳳凰臺

吳景伯

浣溪沙 鳳凰臺

韓鶴山

滿江紅 雨花臺用弟履齋
潛烏衣園原韻

吳淵

滿江紅 懷舊

明劉基

清平調 白鷺洲

易震吉

清平調 杏花村

前人

清平調 青溪

前人

清平調 天界寺

前人

清平調 孝侯臺

前人

清平調 吉山

前人

江寧府部紀事

職方典第六百六十七卷

江寧府部藝文三 詞

桂枝香 金陵懷古

宋王安石

登臨送目正故國晚秋天氣初肅千里澄江似練翠
 峯如簇征帆去棹斜陽裏背西風酒旗斜矗綉舟雲
 淡星河鷺起畫圖難足 念自昔豪華競逐歎門外
 樓頭悲恨相續千古憑高對此漫嗟榮辱六朝舊事
 隨流水但寒煙衰草凝綠至今商女時時猶唱後庭
 遺曲

古今圖書集成
西河 金陵懷古

周美成

佳麗地南朝盛事誰記山圍故國遶清江髻鬟對起
怒濤寂寞打空城風檣遙度天際斷崖樹猶倒倚
莫愁艇子曾繫空餘舊蹟鬱蒼蒼霧沉半壘夜深月
過女牆來傷心東畔淮水酒旗戲鼓甚處是想依
稀王謝鄰里燕子不知何世向尋常巷陌人家相對
如說興亡斜陽裏

滿江紅 烏衣園

吳潛

柳帶榆錢又還是清明寒食天一笑滿園羅綺滿城

簫笛花樹得晴紅欲染遠山過雨青如滴問江南池
館有誰來江南客烏衣巷今猶昔烏衣事今難覓
但年年燕子晚烟斜日抖擻一春塵土債淒涼萬古
英雄蹟且芳樽隨分趁芳時休虛擲

沁園春 鳳凰臺

吳景伯

再上高臺訪謫仙今仙何所之但石城西踞潮平白
鷺浮圖南峙雲淡烏衣鳳鳥不來長安何處惟有碧
梧三數枝興亡事對江山休說誰是誰非庭花飄
盡臙脂算結綺繁華能幾時問何人重向新亭揮淚

何人重到別墅圍棋笑拍欄干功名未可寧肯綠蓑
尋釣磯深深飲任玉山醉倒明月扶歸

浣溪沙

鳳凰臺

韓鶴山

瀟灑梧桐幾度秋鳳凰飛去舊山幽風景不殊人物
換恨悠悠 衰草遠從烟際合夕陽空趁水西流恰
好凭樓便回首怕生愁

滿江紅

雨花臺用弟履齋
潛鳥衣園原韻

吳淵

秋後鍾山蒼翠色可供食食登臨處怨挑舊曲催梅
新笛江近蘋風隨汎落峯高松露和雲滴歎頭童齒

豁已成翁猶爲客 老懷抱非疇昔歎意思須尋覓
人間世假饒百歲苦無多日已沒風雲豪志氣祇思
烟水閒蹤跡問何年同老轉溪濱漁鉤擲

滿江紅

懷舊

明劉基

風淡雲輕又還是清明時節幾處處莓苔鋪繡碎紅
堆纈滿樹綠陰堪止渴漫山黃霧松花發背書闌獨
立檢韶華聞鷓鴣 懷往事空凄切思不斷腸千結
想繁華一瞬夕陽明滅元武湖邊楊柳月鷄鳴埭上
棠梨雪到如今何處覓遺蹤泉聲咽

清平調 白鷺洲

易震吉

金陵美酒孫楚樓中有座上狂歌人拍手笑問莫愁
安否 中分二水悠悠碧蘅紅杜芳洲我所思兮白
鷺石頭烟柳西頭

清平調 杏花村

前人

似紅似白樹樹都開徹二月春風飛絳雪新出小鶯
饒舌 踏青有臉如花笑歌聲裏琵琶我所思兮村
落搖旗沽酒人家

清平調 青溪

前人

清流九折浮著鍾山色醉客欲歸歸未得畫槳輕搖
明月 岸頭喚取盃中當壚嫋嫋吳風我所思兮溪
水桃花萬點飛紅

清平調 天界寺

前人

香焚茗熟佳趣僧家獨賸有名庵三十六到處先生
天竺 雨花諸勝為鄰山中却少纖塵我所思兮天
界入門松氣清人

清平調 孝侯臺

前人

側身懷古豪傑都塵土細想截蛟并刺虎此等雄風

古今圖書集成
不腐 忠臣孝子垂名元來陽羨書生我所思兮臺
上秋花空滿寒城

清平調 吉山

前人

群崖相接牽引春風屨日晚江南望江北野色遙分
建業 勝情幽討無邊時逢怪石清泉我所思兮山
上攜詩堪問青天

江寧府部紀事

三國志孫權傳赤烏八年遣校尉陳勳將屯田及作
士三萬人鑿句容中道自卜其至雲陽西城通會市
作邸閣

吳錄劉備曾使諸葛亮至京因觀秣陵山阜乃嘆曰
鍾山龍盤石頭虎踞帝王之宅也

孫權時掘得銅匣長二尺七寸以琉璃爲蓋又一白
玉如意所執處皆刻龍虎及蟬形莫能識其由使人
問胡綜綜曰昔秦皇以金陵有天子氣諸山阜處處

輒埋寶物以當王氣此蓋是乎

府志曹操初得荊州說者謂東南之勢可以拒操者長江也操既得荊州則長江之險已與我共之獨周瑜謂捨鞍馬而仗舟楫非彼所長赤壁之役果有成功

晉人伐吳王濬樓船自益州而下直抵建康初羊祜之言曰南人所長惟在水戰一入其境長江非復所用他日成功略如祜言

晉書元帝本紀始皇時望氣者云五百年後金陵有

天子氣故始皇東遊以厭之改其地曰秣陵漸北山以絕其勢及孫權之稱號自謂當之孫盛以爲始皇逮於孫氏四百三十七載考其曆數猶爲未及元帝之渡江也乃五百二十六年真人之應在於此矣咸寧初風吹大社樹折社中有青氣占者以爲東莞有帝者之祥由是徙封東莞王於瑯琊卽武王也及吳之亡王濬實先至建鄴而皓之降款遠歸壘於瑯琊天意人事又符中興之兆太安之際童謠云五馬浮渡江一馬化爲龍及永嘉中歲鎮熒惑太白聚牛女

古今圖書集成
之間識者以爲吳越之地當興王者是歲王室淪覆
帝與西陽汝南南頓彭城五王獲濟而帝竟登大位
焉

王導傳蘇峻平宗廟宮室並爲灰燼溫嶠議遷都豫
章三吳之豪請都會稽二論紛紜未有所適導曰建
康古之金陵舊爲帝里又孫仲謀劉元德俱言王者
之宅古之帝王不必以豐儉移都苟弘衛文大帛之
冠則無往不可若不績其麻則樂土爲墟矣且北寇
游魂伺我之隙一旦示弱竄於蠻越求之望實懼非

良計今特宜鎮之以靜羣情自安由是嶠等謀並不
行

府志戴顓逵之子也有巧思自漢世始有佛像形製
未工顓特善其事宋世子鑄丈六銅像於瓦官寺既
成時議面恨瘦工人不能改顓曰非面瘦臂胛肥耳
乃減臂胛患卽除無不歎服

晉興寧中瓦官寺初建僧衆設會請朝賢鳴刹注疏
無有過十萬者顧愷之來直打刹注一百萬愷之素
貧時以爲大言後寺成僧請勾疏愷之令閉戶往來

古今圖書集成
一百餘日於壁上畫維摩一軀工畢將欲點眸子謂
寺僧曰第一日開見者責施十萬第二日開可五萬
第三日可任例責施及開戶光明照寺施者填塞果
得百萬

上元縣志越王雷門鼓傳至孫吳置臺城端門上有
二鶴來自會稽擊之聲聞洛陽後孫恩亂兵擊破有
二鶴冲天而去鼓自是不鳴人呼潛鶴鼓

南史宋武帝伐荻新洲見大蛇長數丈射之明日復
至洲間聞有杵臼聲往覘之有童子數人皆著青衣

於秦中搗藥問其故曰王爲劉寄奴射傷搗藥以傳
之帝曰汝王神何不殺之曰寄奴王者不可殺帝叱
之皆散去收藥而反今薛家洲是其地也屬金陵鄉
去城四十里

六合縣志宋孝武渡六合龍舟翔鳳以三千四十五
艘計蓋舟航之盛三代二京無比焉
南齊書竟陵王子良傳子良爲丹陽尹開私倉賑屬
縣貧民明年子良上表曰京尹雖居都邑而境壤兼
跨廣袤周輪幾將千里縈原抱隰其處甚多舊遏古

塘非唯一所而民貧業廢地利久蕪近啓遣五官殷
灞典籤劉僧瑗到諸縣循履得丹陽溧陽末世等四
縣解并村耆辭列堪墾之田合計荒熟有八千五百
五十四頃修治塘過可用十一萬八千餘夫一春就
功便可成立上納之會遷官事寢
江寧舊志齊明帝末年東陽女子婁逞變服詐稱丈
夫粗知圍棋解文義徧遊公卿門仕至揚州議曹從
事事方泄明帝令東還始作婦人服歎曰有如此伎
還爲老嫗豈不惜哉近人妖也

先是晉元帝渡江時隨帝有王離妻李氏者洛陽人
將洛陽舊火南渡自言受道於祖母王氏傳此火并
有遺書二十七卷火色甚赤異於餘火四方病者將
此火煮藥及灸諸病皆愈轉相妖惑官司禁不能止
及李氏卒火亦經時而滅人號其所居爲聖火庵在
今縣東南三里禪衆寺直南出御街齊武帝末年謠
言云赤火南流喪南國帝憂之是歲果有沙門從北
來賣此火至火色赤於常火而微云可治疾貴賤爭
取之先齋戒以火灸桃板七炷而疾愈吳興丘國賓

古今圖書集成
竊還鄉邑人楊道慶虛疾二十年形容骨立依法灸板一炷卽痊是月武帝崩

江寧縣志宋吳郡婦人韓蘭英有文辭孝武時獻中興賦被賞入宮明帝用爲宮中職僚齊武帝以爲博士教六宮書學呼爲韓公

上元縣志射雉場圖經云在城東二十里齊東昏置射雉場五百所皆以七寶裝翳

雞鳴埭在潮溝上齊武帝早遊鍾山射雉至此始聞雞鳴

郭文字文舉王茂弘築臺於冶城以處之文嘗手探虎鯁茂弘問之對曰情由想生不想卽無人無殺獸之心獸無傷人之意

周顒於鍾山西立隱舍雖有妻子獨處山舍王儉嘗問曰卿山中何所食顒曰赤米白鹽綠葵紫蓼文惠太子問菜食何味最勝曰春初早韭秋末晚菘

散騎常侍劉劭經始鍾嶺之南以爲棲息聚石蓄水朝士雅素者多從之遊

汝南灣當秦淮曲折處陸惠曉家於灣前張融自稱

古今圖書集成
天地逸民牽船住岸卜以鄰居劉璉來吳謂人曰吾聞張融與惠曉并宅其木必有異味酌而飲之曰飲此則鄙吝之萌盡矣

天監五年丹陽山南得瓦物高五尺圍四尺上銳下平蓋如合焉中得劍一瓷具數十時人莫識沈約云此東裔罨蓋也葬則用之代棺此制度卑小則隨當時矣東裔死則坐葬之武帝服其博識

南北朝張僧繇常於金陵安樂寺畫四龍而不點睛每云點之則飛去矣人以爲妄因請點之須臾雷電

破壁見二龍飛去未點睛者如故初吳曹不興圖青谿龍僧繇見而鄙之乃廣其象於龍泉亭太清中雷震龍泉亭遂失其壁乃知疑於神也晉瓦官寺梁開善寺俱有僧繇畫

上元縣志長命洲在石頭城前梁武帝放生之所帝日市鵝鴨雞豚之屬放於此置戶十家以穀粟餵養以洲爲長命洲歲畜者每等千數多爲狐狸食之其掌戶亦竊而烹食各得其半輿地志云魏使李恕來聘帝止於此放生問恕曰北土亦頗知此事乎恕曰

魏固不殺亦不放帝無以應

慶元志梁到漑第臨淮水齋前地有礪石長丈六尺武帝戲與賭之漑輸即迎置華林園宴殿前迎石日傾都縱觀謂到公石也

臺城刻漏署本洛陽故物宋平姚秦遷於此魏明帝為太子時翫以玉手板刺螭口中不出後人常見白蠅蜒在其中梁元帝移之江陵遂不復見

陳書樊毅傳毅入為侍中護軍將軍及隋兵濟江毅謂僕射袁憲曰京口采石俱是要所各須銳卒數千

金翅二百都下江中上下防捍如其不然大事去矣諸將咸從其議會施文慶等寢隋兵消息毅計不行京城陷

上元縣志陳宣帝太建十年立壇婁湖側臨壇誓眾分遣大使以盟誓頒四方警備周人

建康實錄陳禎明二年覆舟山及松柏林冬月出木醴後主以為甘露之瑞俗呼為雀餒

舊志李太白上裴長史書云白家居金陵世為右族遭沮渠蒙遜之亂奔流咸秦因官寓家觀此白亦金

古今圖書集成
陵人後爲供奉求還山乘舟至金陵有從子僧中孚
止高座寺白依焉嘗著宮錦袍坐舟中浮江而下旁
若無人又嘗脫紫綺裘換酒飲落星磯上

金陵屬邑溧水溧陽舊多蠱毒丞相韓滉爲浙江觀
察欲絕其源未得時有僧住竹林寺每絹一疋易藥
一丸中蠱者多獲全濟值滉小女有惡疾浴於溫泉
而愈乃捨女妝奩造浮圖於泉之右延竹林藥僧主
之滉因求其方刊石於二縣之市以流布焉唐末喪
亂石不復存而溫湯之寺不改鎮之夏氏世傳其法

寺以溫湯爲名誌所自也

六合縣志唐張延賞蒲州人爲淮南節度使歲旱民
他遷吏禁之延賞曰食者人恃以活拘此而斃不如
適彼而生乃具舟遣之勅吏爲修室廬以逋逃歸者
更增於舊瓜步舟艫津湊而遙係江南延賞請改屬
揚州於是行無稽壅會母喪免

唐末貞二年三月彩虹入潤州大將張子良宅初入
漿甕水盡入井飲之後子良擒李錡拜金吾尋歷方
鎮

古今圖書集成
會昌中有顏濬秀才遊瓦官寺遇陳宮人同遊語濬
曰今日偶此登臨爲惜高閣不久毀除故來一別耳
後數月其閣果因寺廢而毀

南唐近事金陵城北有湖周迴十數里幕府鷄籠二
山環其西鍾阜蔣山諸峯聳其左名園勝境掩映如
畫六朝舊跡多出其間每歲菱藕罟網之利不下數
十千建康實錄所謂元武湖是也一日諸閣老待漏
朝堂語及林泉之事坐間馮謐因舉元宗賜賀監三
百里鏡湖信爲盛事又曰予非敢望此但賜後湖亦

暢予平生也吏部徐鉉怡聲而對曰主上尊賢待士
常若不及豈惜一後湖所乏者知章爾馮謐大有慙
色

江寧府志南唐時溧水桑樹中生一木人長六尺如
僧狀右袒左跪衣被皆備其色如純漆可鑑謂之須
菩提

南唐將亡數年前修昇元寺殿掘得石記其辭曰莫
問江南事江南事可憑抱雞昇寶位趁犬出金陵子
建居南極安仁秉夜燈東鄰嬌小女騎虎踏河冰宋

古今圖書集成
師以甲戌渡江後主實以丁酉年生曹彬爲大將列
柵城南爲子建也潘美爲副將城陷恐有伏兵命卒
縱火卽安仁也錢俶以戊寅年入朝盡獻浙右地
溧陽縣志閭史西寺有殿供觀音夙著靈異侍郎劉
岑爲記宋建炎中車駕渡江尚書郎吳若時爲頓遞
所幹辦官兼營繕行宮欲亟成毀僧道之廬以給用
旣拆門樓廊廡將及是殿大士慈相示變出舍利如
汗珠斧之不散縣宰及吳皆驚異遂獲存
燕翼貽謀錄真宗皇帝東封西祀思顯先烈大中祥

符七年正月乙卯詔陞應天府爲南京建行宮正殿
以歸德爲名以聖祖殿爲鴻慶宮奉太祖太宗像侍
立於聖祖之旁其後遂開高宗皇帝中興之祥此正
殆非偶然者矣

墨莊漫錄王荆公退居金陵建宅於半山蓋自城至
鍾山寶公塔路之半因以得名宅後有謝公墩乃謝
安石居東山之所也荆公云我名公字偶相同我屋
公墩在眼中公去我來墩屬我不應墩姓尙隨公其
後公捨宅爲報寧寺寺今亦廢未復舊而墩巋然獨

存

宋史蔡洸傳洸知鎮江府會西溪卒移屯建康舳艫相銜時久旱郡民築陂瀦水灌溉漕司檄郡決之父老泣訴洸曰吾不忍獲罪百姓也卻之已而大雨漕運通歲亦大熟民歌之曰我瀦我水以灌以溉俾我不奪蔡公是賴

胡銓傳銓以起居郎兼侍講國史院編修官進言乞都建康謂漢高入關中光武守信都大抵與人鬪不搯其吭拊其背不能全勝今日大勢自淮以北天下

之吭與背也建康則搯之拊之之地也若進據建康下臨中原此高光興王之計也詔議行幸言者請紓其期遂以張浚視師圖恢復侍御史王十朋贊之克復宿州大將李顯忠私其金帛且與邵宏淵忿爭軍大潰十朋自劾上怒甚銓上疏願毋以小劾自沮張守傳守以紹興六年參知政事兼權樞密院事八年正月上自建康將還臨安守言建康自六朝爲帝王都江流險闊氣象雄偉且據都會以經理中原依險阻以捍禦強敵可爲別都以圖恢復趙鼎持不可

守力求去以資政殿大學士知婺州

王阮傳阮字南卿江州人少好學隆興元年進士時孝宗初卽位欲成高宗之志首詔經理建業以圖進取而大臣異懦幸安計未決阮試禮部對策曰臨安蟠幽宅阻面湖背海膏腴沃野足以休養生聚其地利於休息建康東南重鎮控制長江呼吸之間上下千里足以虎視吳楚應接梁宋其地利於進取建炎紹興間敵人乘勝長驅直擣而我師亦甚憊也上皇遵養時晦不得與平迺駐臨安所以爲休息計也已

三十年來闕者全壞者修弊者整廢者復較以曩昔倍萬不侔主上獨見遠覽舉而措諸事業非固意臨安爲不足安也戰守之形旣分動靜進退之理異也古者立國必有所恃謀國之要必負其所恃之地秦有函谷蜀有劔閣魏有成臯趙有井陘燕有飛狐而吳有長江皆其所倚以爲國也今東南王氣鍾在建業長江千里控扼所會輟而弗顧退守幽深之地若將終身焉如是而曰謀國果得爲善謀乎且夫戰者以地爲本湖山回環孰與乎龍盤虎踞之雄胥潮奔

古今圖書集成
猛孰與乎長江之險今議者徒習吳越之僻固而不
知秣陵之通達是猶富人之財不布於通都大邑而
匣金以守之愚恐半夜之或失也倘六飛順動中原
在跬步間况一建康耶古人有言千里之行起於足
下人患不爲耳知貢舉范成大得而讀之嘆曰是人
傑也調南康都昌主簿

江寧府志沈存中曾於建康見發六朝墓得玉臂釵
兩頭施宛轉可以屈伸令圓僅於元縫爲九龍繞之
功侔鬼神

清波雜誌輝居建康春時偕一二鄰曲至內後景陽
臺臺之下一尼庵少憩見若琉璃色一瓦甃徑二尺
許厚三四寸中空用以閣盆盎叩之鏗然有聲尼云
近墾地得之乃李後主用此引後湖水入宮者又至
白下門齊安院主僧曰近治地得一玉杯已碎銀一
錠上刻未定公主爲誌公和尚淨髮之資一樣十錠
行人問宮殿耕者得珠璣誠不吾欺

府志初京師輻輳軍民居室皆官所給連廊櫛比無
復隙地商人貨物至者或止於舟或貯於城外民居

古今圖書集成
狙獐之徒從而持其價高下在手商人病之明祖知其然命工部於三山等門外瀕水處爲屋數十楹名曰塌坊商人至者俾悉貯貨其中旣納稅從其自相貿易狙獐無所與商旅稱便後所司於貧民負販者亦驅使投稅應天府尹高守禮以爲言遂命禁之高淳縣志明初建天地壇徵梁木于淳時以唐昌千墩岡梅木應詔昇次石白湖濟渡處有詔罷之木遂置水濱漸沒入砂磧初歲正二月間有梅木漂浮波面甚蕃後稍稀然亦常有數片今其地名梅塘而尚

以梅梁名渡云

分界楊村民楊義者明洪武十九年戍雲南而死子貞二負屍歸其妻袁氏號泣繼死遂合葬焉後塚上生荆一株傍根處復挺一枝其葉則榆也榆荆異木而同本人以爲義感云

府志縣東南六十里有一橋舊構以木靖難兵起至金陵本兵齊泰奔赴閩廣倡義勤王至橋橋拆棄馬步行追及遇難鄉人高其誼因名馬步橋以志之今梁以石

古今圖書集成
浦口守禦門前一障壁原畫一犴云太祖所設以敵
隔江儀鳳門內獅子山後一守禦每五鼓下操馬至
壁前輒驚跳守禦怪之因撤此壁自是江水嚙地五
里許詢之土人云先是渡江覓驢五里始上船今船
直至浦口城牆下矣

方正學靖難被害門人廖鏞廖銘私拾其骨葬之不
封不樹無可認識萬曆初立方祠於永寧寺後山聚
土非原葬處也上海徐鯨刻一聯云十族遺骸埋聚
寶千年孤塚表長干今舊祠已廢新建者移西南二

十步許

高淳縣志縣建自弘治六年其議始於應天府丞寶
應冀綺維時一村落耳綺得請則躬往相度經營數
載首卜澤宮規制悉具指授工徒迺列植貞松於垣
後曰松出牆丈淳其有興乎後十餘年松踰牆隨有
領鄉薦者自是人文不絕今松日茂繞如列障冀實
大有功於淳民云

明會典嘉靖二十二年題准南京通濟等十二門裏
外沿城地土見被軍民人等承佃耕住者除近城拆

毀外其離城稍遠不分已未納租通行掣算照例起科交納守備衙門收候閱操賞軍支用今後不許再行侵占違者本部徑自拿問

三十五年題准京城金川門等處無兵專守將浦子口指揮量加署都指揮僉事換給勅書令其提調金川上元佛寧觀音四門官軍操練防守

府志焦僥三尺短之至也南京帑中藏有兩焦僥用樟腦函之萬曆戊戌間取入內觀焉函中記云嘉靖間鬚眉尚存今落已其物長尺餘耳百體宛然人也

不知何時所存

五石馬鞍等山初不知有煤明嘉靖末有取煤者過之曰煤山也因鑿井出煤取之不竭鑿至往時舊井處橫板拄木尚存煤已復生滿井矣有二人入鑿土崩壓井中三日家人灼龜卜之先灼小龜弗兆復購一巨龜卜之兆報以生因共致力掘土土盡人見尚不死因問井中何似曰昏昏似夢中先見一小龜遶身莫知所往後見一大龜遶身三匝嚙其拇指因驚醒龜之靈異如此

漱石閒談萬曆十五年一舩過天生橋下約有十數人忽見河中一大魚如三十斤者躍而上山舟中人競上索之而山上大石忽墜擊舩遂沉至今此水道竟塞

府志萬曆甲辰中秋朱王孫承彩開大社於金陵胥會海內名士張幼于輩分賦授簡百二十人秦淮伎女馬湘蘭以下四十餘人咸相與緝文墨理絃歌修容拂拭以須宴集若舉子之望走鎖院焉承平盛事白下人至今艷稱之

戊申夏大雨駢作江水汜濫從來所未有也鼓樓旁有園丁以筍篷苦蕒缸一日偶揭視之見蕒上有一龍蟠曲之跡鱗甲爪鬣纖悉畢具又江上有漁人遙望水面一葦蓆浮至近視之上有小兒坐木車中生可數月耳葦蓆下羣蛇蜿蜒蟠結負之漁人遂收此兒育爲己子

天界寺有佛牙闊寸長倍寸之五萬曆中僧人眞淳獻之尚書五臺陸公公因具金函檀龕盛之迎供于寺之毗盧閣牙得之天台山中

長干寺舊有阿育王塔梁大同三年高祖改造出舊塔下舍利及爪髮髮青紺色衆僧以手伸之隨手長短放之則屈爲蠡形始吳時有尼居此地爲小精舍孫綝尋毀除之塔亦同泯吳平後諸道人復於舊處建立焉梁簡文咸安中使沙門安法師造小塔未及成而亡弟子僧顯繼修之其後西河離石縣劉薩何者遇疾暴亡七日更蘇說云有兩吏見錄至十八地獄隨報重輕受諸苦毒見觀世音語云汝緣未盡若活可作沙門洛下齊城丹陽會稽並有阿育王塔可

往禮拜則不復入地獄因此出家遊行至丹陽未知塔處乃登越城望見長干里氣色有異因就禮拜果見阿育王塔所放光明由是定知有舍利乃集衆掘之入一丈得三尺碑中一碑有鐵函函中有銀函銀函中有金函盛三舍利及爪髮各一枚長數尺卽遷舍利近北對簡文所造塔建一層塔十六年沙門僧尚加爲三層卽梁高祖所開者也至南唐時廢寺爲營廬久之舍利數見感應祥符中詔復爲寺卽其表見之地建塔賜號聖感舍利塔天禧元年改名天禧

寺元至順初賜金修塔塔完之日天花如雨祥光如
練滿空者數日明永樂中即其地重建大報恩寺塔
高九層純用琉璃為之凡十六年始畢工其壯麗甲
古今佛刹矣第不知塔中舍利仍是阿育王塔中所
函否嘉靖中塔為雷震頂少偏萬曆中雪浪大師重
修之人謂斯塔有三篇名筆陳石亭記盛雲浦賦焦
澹園募緣疏

雪浪修塔時所構鷹架與塔頂埒有僧時居雪浪座
下善升高值新雨後著釘鞋登塔之九層從門出反

身以手援簷距躍而上至承露盤中眾人自下望之
為股栗而此僧往來旋轉捷若飛猿咸詫以為神
固城湖有聲起自水中如大砲遠近皆聞之然不知
在何所近有漁者繫舟於葦邊至中夜忽然聲震蓋
自水底起焉今歷十餘年皆然亦無他故不審何謂
縣北門外一里許曰甘村有大樹一株鄉愚附會為
有神實憑之所禱輒應傾動男女襍踏紛擾廉憲魏
鵬池惡其妖妄白邑侯莊立伐去妖遂絕伐時樹果
有血流焉明天啓六年事

崇禎丙子年長山峯前龍藏其下路出其上一日風雨晦冥迅雷掣電龍奮飛而去土開圻四五丈首大尾小四肢宛然聚觀者數千有醫姓汪者於龍首伏處取土煎冰片數斤至今傳焉

縣北十里有古城遺址地名城上有賽神塲臨小窪一日里人議平高填塞之掘五尺許出髑髏如巨斗已復出骨二約長三尺衆皆異之有徽客家唐溝先一夜夢金甲人仗劍言曰吾晉朝將軍守薛城歷年明日被難宜急救客驚悟迨晨訪所謂薛城因抵城

上適過獲髑髏處遠近老幼方堵觀駭嘆客心知爲夢驗矣遽跪拜具實告中有秉鍤者聞言若有所記憶曰咄咄客夢吾何符邪釋鍤亦泣拜衆盡驚懾率亦羅拜爰殮諸棺昇祖塋葬焉夫淳昔爲晉地曰薛城與故老所傳契合晉固多將軍號然尋所謂薛城者不得也豈如馬遷傳贊遺紀信於漢耶

縣西三十里顯慈寺門有二石獅忽裂其縫五寸許已而漸合今將滿矣人皆異之

盧公玉田取選時夢中得句云水國微茫路不分紅

香引入白雲深後官南戶部過湖恍如夢中句因續
云仙洲恍覺非人世民部無論有翰林日永放衙看
鶴舞雨餘憑檻聽龍吟平生剩有烟霞癖宦海何當
慰此心

江寧紫荊山卽古之鍾山蔣山也明陵寢在焉葬之
時掘土數尺見一石龜頭頸長數寸足尾口耳儼然
皆真藏太廟中久晴而腹下有水則雨久雨而腹下
乾則晴其異如此

清異錄載金陵七妙蓋可照面飯可打擦臺餛飩湯

可注研濕麪可穿結帶麪可映字醋可作勸盞寒具
嚼著驚動十里人今猶有此數物麪餅以城南高座
諸寺僧所供爲勝餛飩湯與寒具市上鬻者頗多寒
具卽餛飩子醋絕有佳者但作勸盞恐齒齷不禁一引
耳秀實又言金陵士大夫頗工口腹至今猶然而餽
餽家又競稱吳越間世言天下諸福惟吳越口福亦
其地產然也

府志畱都午門前有數尺地不生青草云是方孝孺
受刑處

古今圖書集成
牛首弘覺寺禪堂有丹竈投以薪火風自內生甚熾
烈須臾爨熟如去薪火卽止

欽天山有觀象臺上度銅渾儀四隅柱各一龍蟠繞
拱之而龍各以一銅銀錙繫之相傳前幾年風雨中
一龍曾飛去人伺而見之遂加鎖自是不復飛

湖熟好事者結一社每十餘年始一舉是十年中積
銀數千金爲一日之會往觀者數萬人勞民傷財亦
一陋習李象先詩云梁武分封處秦淮古渡邊隔橋
雙市井環水萬家田村社巫相賽鄉儺戲競妍空中

臺閣聳掌上綺羅縣擷彩迎花麗藏機引轂旋竿頭
擎舞豎獸背挾飛仙絡繹珠幡裊婆娑繡帶聯烏王
肩大士蟾窟隱便娟錦束霞光削綃輕雪態翩戈矛
時擊刺鼓吹逐喧闐上祀還芻狗鬼工肖木鳶誰將
虛景聚彌使俗情牽比屋觀如堵馳車望若川歌姬
凝翠黛遊子滯樓船作偏雖無後歆神若有年昇平
人自樂豪舉事堪傳

溧水東南二十五里有烏鯉廟昔民有女感黑龍於
田野歸而有娠產一鯉魚投於水中復能變化隨母

出入後乘雲而去母亡每春時必來墳所鄉人立廟祀焉

溧水道上天生橋兩山壁立中一河如帶其橋乃開河時所畱石棧故名天生乃明太祖時崇山侯李新所開也土人傳侯虐人甚受剝膚之刑考之實錄侯以開河受賞殊無其說

先是秣陵科第稀相地者謂水聚於武定橋儒學前宜設橋以關水因設文德橋草創以木後以石易之豎極橋下得一鑿鑿中有錦鯉三又金鎖甲一人以

爲鼎甲之兆嗣是焦朱顧相接及第

孝陵衛觀音寺觀音座後壁一石方一丈六尺餘大士背石坐旁視之大士眉髮正映其中如對鏡然

靈谷寺經回祿後尚有吳偉畫壁三堵嚴介溪詩回廊古壁留名畫墜葉冷風助梵音蓋指此後不存姚元白曾託友人臨之寺又有寶誌公所遺法被四面繡諸天神像中繡三十三天崑崙香水海高一丈二尺闊如之真齊梁時物

寶光寺有西域來貝多婆力叉經長可六七寸廣半

之葉如細猫竹筍殼而柔膩如芭蕉梵典言貝多出摩伽陀國長六七丈經冬不雕其葉可寫字貝多婆力义此翻葉樹也經字大如小赤豆旁行蠕蠕如蟲豸不識其爲何經外以二木片夾之其木如杉而紋細緻可愛南都諸寺中僅有此經而已記言此貝葉經保護可六七百年

祖堂幽棲寺有歷代祖師像黃貞甫膳部命工臨摹載歸天竺供養復有布履一雙長可尺四五寸云是懶祖所遺

末慶寺有古藏經板刻工雅紙色古淡非宋刊則元刊也較今南藏本稍低而狹以木函之今無復存碧峯寺非幻庵有沉香羅漢一堂乃非幻禪師下西洋取來者像最奇古香更異常萬曆中有人盜其一僧不得已以他木雕成補之後忽黑夜送回前像羅漢之靈異可推矣

南門外小市南去有善世橋與天界寺不遠橋邊有石碑一通上刻一絕云小澗何年躍馬蹄白沙翠竹淨無泥石橋流水行人過野路斜陽倦鳥啼王介甫

題乃知橋之所跨者躍馬澗或以爲蘼蕪澗非也
天界寺西偏半峯僧舍有宋磁大士高可二尺許云
農夫鋤地得之田間不損鋤鑿若有神呵護者北都
西山亦有宋磁大士身與天界寺等亦云得之田間
豈神物有對邪

靜海寺有水陸羅漢像乃西域所畫太監鄭和等攜
至每夏間張掛都人士女競往觀之

方山定林寺有乳鐘卽所稱景陽鐘也鐘有一百八
乳乳乳異聲故名又有象皮鼓云是象皮所鞞

南中以工技著名者有徐守素蔣徹李信之修補銅
器鄒英學於蔣徹而次之李昭李贊蔣誠之製扇骨
劉敬之之小木又如濮仲謙之竹器皆一時絕藝若
仲謙高雅之士此其餘事耳爲近時所不及

黃蘊真名琳字美之家有富文堂收藏書畫古玩冠
於東南吳中都元敬自負賞鑒一日同顧華玉聯騎
過美之看畫元敬謂之曰姑置宋元其亦有唐人筆
乎美之出王維著色山水一卷王維伏生授書圖一
卷又出數軸皆唐畫也元敬驚嘆以爲平生未見

庚巳編南京貢院錦衣衛指揮紀綱宅也綱有寵文
皇帝朝後坐不法伏誅闔門受殲於是至今每鄉試
時舉子入院輒有聲自地中起歷諸號而止如萬馬
騰踏者

建康城北有雞籠山焉東麓有泉至清而甘水旱不
增減道人令隱構精廬於其陽酷愛此泉以為靈液
思作銘贊忽夢一人元巾素衣謂隱曰此泉已有銘
矣即高吟云源發石中脉分塵外如醴之味與時而
在吟罷不見因勒於石

秣陵蘆政官舍有荒地三十畝李升仲水部開池種
蓮四岸列芙蓉楊柳稍前分畦藝蔬間以桃李桑柘
為居民值利板橋朱楯虹霞掩映可為遊觀之資梅
花開日水部曾勝集其間有花勝巧裁淮浦雪冷香
歸夢洛陽春句都人士傳誦之

舊五城兵馬曰頭牌二牌五牌者頭牌有印無牌二
牌五牌皆有令牌故云然夜間巡城則執牌指揮使
以下見牌皆跪尚寶司坐廳日兵馬送查以物擊之
以驗不壞牌銅鑄身圓如鏡上如荷葉有蒂作孔以

古今圖書集成
繫繩一面楷大書令字一面符篆夜巡牌三字兩旁
楷書某字幾號四字

清波雜誌張文潛雜書云予自金陵月臺謁蔣帝祠
初出北門如辨色行平野中時暮春人家桃李未謝
西望城壁壕水或絕或流多鳩鵲白鷺迤邐近山風
物天秀如行錦繡圖畫中舊讀荆公詩多稱蔣山景
物信不誣白公少客杭州自言欲得守杭卒如其言
予亦云與東坡跋秦太虛夜航西湖至普明院舍舟
從叅僚並湖而行出雷峰度南屏濯足於惠因澗入

靈石塢得支徑上風篁嶺憩於龍井始至壽星院謁
辨才一段奇事景趣略相似皆可以畫但恐畫不就
爾輝雖未嘗夜遊南北山如金陵郊野春游良不疎
想像文潛所歷如在目前足不至者二十餘年特未
知今復何似

府志晉謝元拒苻堅以安江左功殊不小明初建都
金陵凡前朝有功德於民如蔣子文卞壺劉仁贍曹
彬等皆載祀典而不及元殊爲缺略姚千戶福云嘗
遊杏花村徘徊鳳臺下觀戒壇保寧之故基有古祠

古今圖書集成
一所雜處軍營中因入謁題云晉將軍謝元之神像
高尺許晉衣冠查金陵志有謝將軍廟在城西南隅
戒壇院側唐咸通中建居人不知漫以爲土神耳後
正德中重修名康樂祠羅公玘爲之記

明初揭軌有宴南市樓詩云詔出金錢送酒壚綺樓
勝會集文儒江頭魚藻新開宴苑外鶯花又賜醑趙
女酒翻歌扇濕燕姬香襲舞裙紆繡筵莫道知音少
司馬能琴絕代無蓉塘詩話曰國初於金陵聚寶門
外建輕煙淡粉梅妍柳翠十四樓以聚四方賓客觀

揭孟同詩可知國初縉紳宴集皆用官妓與唐宋不
異後始有禁耳永樂中晏鐸金陵元夕詩花月春風
十四樓今諸樓皆廢南市樓尚存

姚福云湯文振先生名鐸自以形傴僂不揚號樗散
道人閒居好著書嘗謂洪武初金陵既定鼎有圖書
紀其官衙街道市里謂之都城志今已模糊不可看
乃增新爲帝里書作一巨冊以示福某初亦喜其志
之勤旣而厭其輒改舊名爲不宜且帝里自是鳳陽
而金陵則王業之本基何爲帝里閱十餘年讀晉書

見王導曰建康古之金陵舊爲帝里孫仲謀劉昭烈俱言王者之宅乃歎湯之書名本此帝里書已不傳所謂都城志者想卽洪武京城圖志今亦不可得見矣

金陵佳麗仕宦者誇爲仙都游談者指爲樂土弘正之間顧華玉王欽佩以文章立墀陳大聲徐子仁以詞曲擅場江山妍淑士女清華才俊歛集風流弘長嘉靖中年朱子价何元朗爲寓公金在衡盛仲交爲地主皇甫子循黃淳父之流爲旅人相與授簡分題

徵歌選勝秦淮一曲烟水競其風華桃葉諸姬梅柳滋其妍翠此金陵之初盛也萬曆初年陳寧鄉芹解組石城卜居笛步置驛邀賓復修青溪之社於是仲交在衡以舊老而莅盟幼于百穀以勝流而至止厥後軒車紛還唱和頻煩雖詞章未嫺大雅而盤游無已太康此金陵之再盛也其後二十餘年閩人曹學佺能始廻翔棘寺游宴冶城賓朋過從名勝延眺縉紳則臧晉叔陳德遠爲眉目布衣則吳非熊吳允兆柳陳父盛太古爲領袖臺城懷古爰爲憑弔之篇新

亭送客亦有傷離之作筆墨橫飛篇帙騰湧此金陵之續盛也啓禎之際李宗伯本寧焦修撰弱侯倡率於前黃監丞明立俞少卿仲茅導揚於後一時詞人若韓孟郁范仲闇林茂之薛千仞輩同聲倡和分題刻燭不數八义之奇選伎徵歌時聽六么之奏茅止生秦淮五日之會賦得投詩弔汨羅作者凡三百餘人遊舫河亭坐客皆滿蓋盛自此而極矣

南都前輩藏書之富者司馬侍御泰羅太守鳳胡太史汝嘉尤號充棟其後人不能守遂多散逸司馬家

書日尤多祕牒有東坡先生論語解鈔本四卷其家後有變故此書亡矣胡氏牙籤錦軸最爲珍異而子孫式微彫落市肆尤爲人所惋惜嗣是沈生予天啓焦漪園竝收藏亦多近皆散失士夫家集書多者今稱黃海鶴雍丞之子虞稷錢牧齋宗伯常爲撰千頃齋藏書記

趙南仲丞相賜第溧陽嘗避暑水亭有詩云水亭四面朱欄繞簇簇遊魚戲萍藻六龍畏熱不敢行海水煎徹蓬萊島身眠七尺白鰕鬚頭枕一枚紅瑪瑙六

古今圖書集成
句既成忽睡去時有侍婢梅姐杏姐戲續云公子猶嫌扇力微行人尚在紅塵道南仲見而存之頗得風人之旨也

明時修三山街牌樓取土得一石高可八寸闊可一尺三寸上刻一詩云青衫白髮老參軍旋糴黃糧買酒尊但得有錢留客醉也勝騎馬傍人門下書子昂二字字與刻皆精工詩乃宋尚書盧秉之作

湛甘泉爲大司馬拆毀庵觀淫祠豹韜衛營中一庵有尼覺清題詩於壁云急忙簡點破袈裟收拾行囊

沒一些袖拂白雲歸洞口肩挑明月向天涯可憐松頂新巢鶴却負籬根舊種花再四叮嚀貓與犬休教流落俗人家世皆傳誦之

丁司空賓濬河於珍珠橋竹橋之間得石山於河底高若干丈上有字云宋某年臧茂叔游此勒是必園林之物久而在河底高岸爲谷邪

城北嘉善寺有奇石景最幽文衡山嘗與許攝泉同遊題詩竹上云蕭蕭落木帶江干翦翦幽花過雨斑豈意旅遊逢九日共來把酒看三山後書丁亥九月

九日徵明同子嘉彥明同子穀來休承卽刻書大竹上好者取書竹製筆筒在王丹丘家

雞籠山五顯廟中有金蓮寶相花在殿臺下花數十年一開顧文莊曾兩見之其莖上下相等粗如巨竹葉短如笋殼包於外花吐莖端色大類芭蕉花青黃白以漸而變瓣中亦有甘露第此花開在莖端初不抽葉與芭蕉異耳南中無二本也

牛首山東北有鄭太監墳墳有紅豆樹一株幹葉俱碧綠結實如紅豆故以爲名

樹之大而久者留都所有無踰銀杏祈澤寺二株云是六朝人植牛首山一株云是懶融時植棲霞寺二株亦是六朝人植皆大可數人合抱而棲霞一株結乳如石筍下垂相傳樹千年始生乳爲尤奇乃知此木最壽宜名爲萬年枝俗傳銀杏開花以夜人自未有見者萬曆中大報恩寺鐘樓旁一株開花滿樹如柳絮人皆見之

欽定古今圖書集成方輿彙編職方典
第六百六十八卷目錄
江寧府部雜錄
江寧府部外編

職方典第六百六十八卷

江寧府部雜錄

丹陽記江寧烈洲吳舊津所也內有小水堪泊船商
客多停以避烈風故以名焉王濬伐吳宿於此簡文
為相時會桓元之所也亦曰溧洲洲上有山山形似
栗伏滔北征謂之烈洲

岡山有穴通大句曲山有石腦在方山下石腦如石
但小斑色而軟形狀圓小色似鍾乳李肇昔有風疾
先多房事服此乃愈

古今圖書集成
石頭城吳時悉土塢義熙初始加磚累甃因山以爲城因江以爲池地形險固尤有奇勢亦謂之石首城也

蔣陵因山以爲名吳大帝陵也

大長安道西張侯橋者本張子布宅處也

續博物志真誥金陵古名之爲伏龍之地句曲山秦時爲句金之所又以積金山得名山生黃金漢靈帝詔採句曲之金以充武庫孫權遣宿衛人採金屯伏龍之地因改名金陵陶洪景云大茅山尚有數坑名

金井山之近東諸處碎石往往皆有金沙真誥又云水色白雖不學道飲此水亦令人壽亦金津液之所旣耶

建康宮殿簿太初宮中有神龍殿去縣三里左太沖吳都賦云抗龍神之華殿施榮楯而捷獵是也

赤烏殿在縣東北五里吳昭明宮內制度上應星宿吳都賦云崇臨海之崔嵬飾赤烏之暉矚是也

通天觀在舊臺城內宋元嘉中築二十三年更修廣之造景陽樓大壯觀又立鳳光殿醴泉堂建業宮有

古今圖書集成
迎風觀

商飆觀在東北十三里籬門亭後亭墩上齊武帝築
九日登以宴羣臣

張敦頤六朝事迹白下本江城之白石壘也齊武帝
以其地帶江山移琅琊居之唐武德元年罷金陵縣
築城於此因其舊名曰白下

朱雀門晉咸康二年作朱雀門新立朱雀浮航南渡
淮水亦名朱雀橋對吳都城相去六里爲御道夾御
溝植柳其上

宋孝武卽位於新亭城南十五里附近江渚

白下亭李白金陵白下亭留別詩云驛亭三楊樹正
當白下門

孝武帝作馳道自閶闔北出承明抵元武湖十餘里
爲調馬之所也

大江西接江寧界東接句容界北接真州六合縣界
沿流一百二十里周世宗問孫忌江南虛實忌曰長
江千里險過湯池可敵十萬之師

秦淮乃秦始皇東巡會稽經秣陵因鑿鍾山斷金陵

古今圖書集成
長隴以疏淮

霹靂溝王荆公詩云霹靂溝西路柴荆四五家憶會
騎款段隨意入桃花在城東五里

今縣東有渠北接覆舟山近後湖里俗相傳此青溪
也其水迤邐西出京都記云京師鼎族多在青溪
北有江總宅

邀笛步在城東南青溪橋之右今上水閘是也晉書
云桓伊善樂盡一時之妙爲江左第一有蔡邕柯亭
笛常自吹之

江寧縣南三十里有慈母山積石臨江生簫管竹自
伶倫采竹嶰谷其後惟此簫見珍故歷代常給樂府
而俗呼鼓吹山今慈湖戍常禁采之王褒洞簫卽稱
此也其竹圓緻異於衆處

錢希言西浮籍石帆瓜步羣峰與幕府盧龍相犄角
大江流金陵者二百餘里稱天險焉

燕子磯北頰大江與弘濟相望磯之得名非王謝美
談徒以其形如燕子耳景亦孤絕僅僅一卷

石頭城吳時悉土阜後乃墉山爲城塹江爲險耳張

九齡有候使石頭驛詩念君石頭驛寄書黃鶴樓談者以茲山當楚之九嶷云

新林浦一名新林港在今西善橋謝朓之宣城出新林白板橋賦詩紀事故李白有明發新林浦空吟謝朓詩之句也

三山卽晉王濬伐吳地三峰排列若几案間物雖無取秀拔駢羅而澄江如練風景依然千載驚人佳句故當擊節

秦淮與外江夾二洲曰白鷺宋曹彬大破江南兵駐

於此李白詩三山半落青天外二水中分白鷺洲摹寫曲盡

太平清話人知溧陽投金瀨爲子胥浣紗女而不知孟郊爲溧陽縣尉亦有投金瀨

客坐贅語金陵之山形家言爲南龍盡處精華之氣發露無餘故其山多妍媚而鬱紆烟容嵐起杳翠霏青望之如古佛頂上之螺美人眉間之黛而特未有奇峯峭壁拔地刺天如瑤簪玉劍突起雲霄之上者江水一瀉千里沙騰浪涌天日爲昏最爲怪偉至靜

夜無風江聲隱起余嘗夜臥弘濟燕磯聽之洶洶如欲崩四壁也後湖泓渟坦施堤楊洲茨綽約媚人山色四圍如靚妝窺鏡湖山之美何減虎林所少者瀑布寒泉耳鍾山之一人泉牛首之虎跑泉攝山之白鹿泉祈澤寺之龍王泉衡陽寺之龍女泉雖一泓未足稱奇然淪茗濯纓固可褰裳提罌而臨試也

江南岸有山孤秀從江中仰望壁立峻絕袁崧爲郡嘗登之矚望焉其記云今自山南上至其嶺嶺容十許人四面望諸山略盡其勢俯臨大江如縈帶焉視

舟如鳧鴈矣

袁崧嘗言江北多連山登之望江南諸山數十百里莫識其名高者千仞多奇形異勢自非煙寒雨霽不辨見此遠山矣余嘗往返十許過正可再見遠峯耳劉禹錫詩朱雀橋邊野草花烏衣巷口夕陽斜按朱雀橋卽朱雀桁也地在今聚寶門內鎮淮橋稍東烏衣巷當剪子巷至武定橋一帶是蓋桃葉渡在武定橋之東而大令有渡江迎接之歌知其家於此也今周子隱讀書臺下舊爲光宅寺乃梁武帝故居六朝

古今圖書集成
士大夫故多家此其地又名南岡武帝評書語曰南岡士夫徒尚風軌不免寒乞正指是耳有謂烏衣巷在今報恩寺右西天寺前傍重譯橋者是不知西天寺門所臨之河乃楊吳所鑿之城壕六代時未有此也晉人多阻淮水南北而居故郭璞爲始興公卜宅有淮水竭王氏滅之讖陳末淮涸而王氏之衣冠文物始盡據此諸書王謝故巷故不應遠淮而嚮長干也

貞白先生秣陵人今秣陵鎮西有陶吳鎮云先生所

生之地又有吳姓與陶氏世居於此故以名其鄉葛仙公亦生於此今鎮之東北鄉名葛仙塘是其證也葛仙公與陶先生俱棲真句曲而方山又別有葛公煉丹池自晉宋而後仙蹟彰顯惟二公爲最乃俱產自秣陵金陵地肺仙靈窟宅豈獨茅山也

金陵新志長干是秣陵縣東里巷名江東謂山隴之間曰干建康南五里有山岡其間平坦庶民雜居有大長干小長干東長干並是地名小長干在瓦官寺之南巷西頭出大江梁初起長干寺按是時瓦官寺

古今圖書集成
在淮水南城外不與長干隔而今塞洪橋西卽是江
水流處其後洲渚漸生江去長干遠而楊吳築城圍
淮水於內瓦官遂在城中城之外別開今壕而長干
隔遠不相屬矣

南都城中道院若朝天宮則枕冶城山靈應觀則俯
烏龍潭盧龍觀則倚獅子山佛寺若鷄鳴寺則坐鷄
籠山永慶寺則傍謝公墩吉祥寺則負鳳凰山清涼
寺則屏四望山金陵寺則辰馬鞍山上瓦官寺則峙
鳳凰臺皆備登臨之美下瓦官寺在杏花村內林木

幽深入其門令人生塵外想鷲峰寺地僻而無可眺
然差與市遠封崇寺雜閭閻中荒涼頽廢致無足言
惟承恩寺踞舊內之右最爲城南囂譁之地游客販
賈蜂屯螻聚於其中而佛教之木又剝竿其蕩然盡
矣

南唐跨有江淮鳩集墳典特置學宮濱秦淮開國子
監舊志在鎮淮橋北御街東里人呼國子監巷擬其
地卽今縣學也

南省大市人貨所集不過數處而最夥爲行口自三

古今圖書集成
山街西至斗門橋而已其名曰果子行他若大中橋北門橋三牌樓等處亦稱大市集然不過魚肉蔬菜之類如銅鐵器則在鐵作坊皮市則在筍橋南鼓鋪則在水西門內履鞋則在轎夫營簾箔則在武定橋之東傘則在府街之西弓箭則在弓箭坊木器舊時南則鈔庫街北則木匠營近多在筍橋口蓋明初建立街巷百工貨物買賣各有區肆今沿舊名而居者僅此數處其他名在而實亡如織錦坊顏料坊氈匠坊等皆空名無復有居肆與貿易者矣城外惟上新

河龍江關二處爲商帆買舶所鱗湊上河尤號繁衍近年以人貧物滯客多止於鳩茲上河遂頗凋零人有不聊生者時之盛衰亦可歎也

露書天下學宮皆書明倫堂獨應天府學書明德堂云文天祥手書存其蹟

几案所供盆景舊惟虎刺一二品而已近來花園子自吳中運至品目益多有天目松瓔珞松海棠黃楊石竹瀟湘竹水冬青水仙小芭蕉枸杞梅花之屬務取其根幹老而枝葉有畫意者更以古瓷佳石安置

古今圖書集成
之一盆至數千錢

上元縣志張乖崖集吳宮有石四一醉石一曬藥石
一翫月臺一朝天壇宋慶元志云已不存矣

初立西州城時未有籬門立烏榜後名其地爲烏榜
村

唐許渾題孫處士居云高歌懷地肺遠賦憶天台極
爲的對真誥云金陵者洞虛之膏腴句曲之地肺注
云其地肥故曰膏腴水至則浮故曰地肺

鑾駕庫迤東有銅井庵庵前井舊以銅爲底蓋下通

大江井中水如鼎沸魚鱗隨水上下焉

鷄冠石本馬光祖園中石與客賞雞冠花刻於上字
畫深入在洞神宮西乃舊宅也

自建康至姑孰一百八十里其險可守者有六曰江
寧鎮曰岡沙夾曰采石曰大信口曰蕪湖曰繁昌又
曰采石渡江闊而險馬家渡江狹而平相去六十里
皆與和州對岸又曰和州烏江縣界可自江北車家
渡徑衝建康府之馬家渡滁州全椒縣可自江北宣
化渡徑衝建康府之靖安鎮又泗州盱眙有徑小路

由張店上下瓦梁盤城亦徑至宣化渡不滿三百里
又自上瓦梁下船直至滁河口可以入江

江寧縣志古蹟儷名白石青谿龍廣山雞鳴埭蟹浦
龍山桐樹灣竹格渡直瀆橫塘西州東府謝公墩杜
母宅三山二水烏榜村青林苑烏衣巷紅蘿亭一人
泉五馬渡商飈館甘露亭蘼蕪澗茱萸隄入漢樓橫
江館南礪北山三品石八卦泉赤烏殿朱雀航珍珠
河臙脂卉鼓吹山幕府寺花林村竹篠港夏侯山朱
年隴覆舟山投書渚蒼龍堰白鷺洲皂莢橋白楊路

赤闌橋籬門五十六所秦淮二十四航落星樓清暑
殿梁五明殿唐百尺樓伏龜樓躍馬礪宋玉燭殿梁
金華樓玉樹後庭金蓮帖地鳳凰里燕雀湖疑城辱
井覆栢池麾扇渡莫愁湖桃葉渡慈姥山道士隄穿
鉞樓邀笛步謝元走馬路盧絳翔鸞坊棲霞寺落星
岡

江寧府部外編

府志宋紹興辛巳金兵南侵有何兼資者奉主將命將小隊遊弈至六合縣見大軍自西北來不類官兵又不類金人須臾號令下寨召兼資入凡五門始至中軍一人中坐官服如天神一人面貌英毅鬚髯皆指天一人向東貌亦俊爽兼資再拜問其姓名面貌英毅者曰吾張巡也指東向者此許遠也兼資少聞張許事因再拜頂禮曰某曾讀唐書見二大王忠義大節今日迺得瞻丰采然信史所載豈皆實乎巡曰

史有何疑兼資因舉食三萬人事巡曰有之而實不然也所食者皆已死之人耳兼資又舉殺愛妾事巡曰亦非殺也吾妾見孤城危迫欲自殺以殉許奴亦以憂悸暴死遂烹以享士蓋用術以堅軍士之心耳又見雷萬春面止一癍謂止中一箭云

相傳明初填燕雀湖為宮殿中有大穴愈填愈深劉青田啓上親填之忽有一婦人抱子從穴中出至太平門外乃隱

六合縣一民家子九歲不能言人以啞目之值同縣

一童子年十四歲過其門啞童忽嗔怒取大石擊死里保聞之官訊其故童即能言曰我與彼前世俱某縣民我貧他富為彼毆死彼賂脫罪我冤莫伸今偕生此地且與彼遇是以報之九年不語者含冤隱忍也官異之牒取二家前生父母妻子併原問卷證一一皆合童見前生眷屬相聚而哭且拜今生父母養育恩曰我冤報矣事畢矣一笑仆地而卒

高淳縣志安興鄉李溪有虞媪者因驟雨以杯承簷間水水中浮紅絲縷飲之遂孕及期產一蛇身具五

古今圖書集成
色媪怖裹而投之溪每至溪浣洗蛇輒來就乳乳亦
湧射蛇以咽承之旣而厭惡之砍以刀正斷其尾蛇
忽變頭角巨軀絳章風雨大作壅土成墩而媪已葬
其中矣龍出溪去行輒回首顧凡回者二十有四一
回則成一灣俗稱爲望娘灣由湖以達蕪湖江口不
知所往每歲寒食及十月節前後必有風雨昏黑數
十里遶葬處雨雹交下皆云龍祭掃至則河魚上壅
居民持網以俟有一人而獲魚數石者漁家每覘龍
之出入以卜魚利如南入而北出則南湖獲倍于北

北入南出利如之至今猶然

縣南五十里新化寺唐時所建明萬曆十七年忽有
二僧載紫霄碧霞佛像至寺衆方聚觀僧隨滅跡鄉
人因建行宮祀之

Blank columns for text within a rectangular frame.



